

兩
當
軒
全
集

兩當軒集卷第十四

武進黃景仁著

古近體詩七十三首

癡兒

索栗憐通子牽窗厭袞師天心憎早慧不敢怨兒癡

雪後集陶然亭先歸道登黑窯廠

城南有高亭亭與城相向城雉銜西山巒巒走青嶂殘雪
時一白破碎失山狀對山開長筵興酣酒力王中有清氣
通迥然發高唱入座皆俊物能容我跌宕轉嫌眼界窄三
面礙屏障欲撤不可得悄焉思遠颺疾覓快馬騎徑去不
復讓豈因困酒逸畧似放翁放一里得高臺于此足遼曠

野風四面合始覺所居亢尺五韋杜天幕我作行帳城遠
隨野闊一線空烟漾入雲翻凍旗暮角隱悲壯北眺瓦一
垓萬戶走鱗浪倏被暝色催幾處遠燈亮九門將傳鑰三
殿久散仗而我此徘徊清絕轉悽愴回憶亭中人不見此
臺上興至各有適何必兩相望撫景傷我心願託陶家葬
去去應復來行行重惆悵

集吳香亭太常齋見所藏孫雪居董香光書畫合

冊作歌

董書唐人五七言絕
句八幅孫爲補圖

人言詩妙畫難盡我言是詩皆畫境人言書妙從畫參我
言畫亦書理兼雲閒董尙書書法昔無敵揮寫唐人五七
言金盞汁破霞賤色漢陽太守孫雪居力追詩意爲補圖

忽忘筆墨在何許時見雲烟空欲無咫尺何論萬里勢蕭
瑟蒼茫極能事是書是畫兩不分呵成一片青霞氣漢陽
烟樹連晴川兩公宦遊爭後先我亦樓頭訪崔顥昔人不
見心茫然古今多少登樓客名籍誰應跨鶴仙太常先生
重毫素不薄今人尤愛古寒宵觴客觀寶臺墨光酒氣相
旋舞我於斯事罕一優不嫌百讀措昏眸祇今墨妙知誰
似俯仰人間二百秋

余伯扶少雲昆仲施大雪帆消寒夜集分賦

今歲不甚寒微寒消更可招邀皆寄公謀飲先及我呼兒
下簾衣促坐圍地火薄具當侯鯖錯列只蔬蓴脂腸鮮花
豬實核慙韭卯苦酒傾百升不醉腹轉果停尊念舊雨太

半散江左我輩如轉蓬復向燕雲墮商略身世事百法欠
帖妥且復永今夕切勿話瑣瑣基劣勝固欣詩好拙亦哿
卽此足相於那覺在塵堞後會宜頻頻不爾愁則頗

借少雲雪帆小飲薄醉口占

同是江南客天涯結比鄰鄉山燈照夢凍面酒回春詩到
十分瘦名傳一字貧若繩三尺法我輩是游民

寄維衍

偏從京國坐羈窮歲儉全家飯二紅舊業已經拋竹北故
人常似隔星東夜窗燈翦連牀雨曉閣帆開醒酒風此景
幾回成昨憶輪君吟斷水雲中

夢回長樂起鐘聲心事慙乖鷗鷺盟苦憶梅花尋廟市愁

隨鴻信到江城移家葛令圖雖就拔宅淮王術未精君念
北堂應及我早將消息寄難兄

時令兄蕙莊亦
奉母居京師

題周上舍愛蓮出關詩後

吳儂生長水烟柔誰識盧龍萬里秋才到

上京方可賦山看絕塞始言游但教珠玉常盈抱便有冰
霜不上頭對此自慙飛動意艸堂風雪看吳鉤

次韋進士書城見贈移居四首原韻奉酬

旅食歡游少蕭蕭閱歲華有牀眠曲尺無雪賦尖叉薄笑
三辰酒醴羞一窰花如何此爲客常似未棲鴉

詞壇見韋虎餘子盡摧顏世以科名重天分歲月閒讀騷
宜飲水拄笏且看山一接清塵末因之破俗慳

晴光披煥襖雲色斂灰楷有客開荒徑期君話冷齋聞居
偏近市小飲愛臨街幸有論文樂長安住亦佳

兩年經再徙何處是吾廬門換新粘帖囊攜幼讀書留賓
猶有榻奉母每無魚慙愧投詩意相將賦卜居

送馮魚山庶常歸欽州

城南昨與溫子別

箕坡

掩關兀兀愁連旬如形逐影恃君在

君亦望雲懷苦辛館閣諸公愛才切欲爲東觀留詞臣連
章累抑乞歸疏刻意爲阻南征輪君方坐歎我竊喜天如
助我羈故人朝來排闥忽相告

帝俞所請頒

恩綸九千里路自此別君復舍我悲奚論四年聚首不爲

暫我懷鬱鬱常未申君才蓋世拔殊藻豈獨珠海稱奇珍
異才自古產遐裔如漢揚馬來峨岷西江詩派一口吸卻
疑涪翁之後身我無筆力愧衰葉得君並世氣乃伸清河
弱弟亦穎妙相隨讀書相對貧玉堂天上坐吟獻不省京
洛多風塵投詩未答豈敢後譬圖嵩岱難爲眞今將作別
詎能默忽忽清淚沾盈巾去年移家至都下傭書僦屋炊
桂薪君如東方亦乞米卻於賤子勞指困一身苦爲故人
累彌畱欲報淹茲辰君今行色亦草草誰與聚糗分俸緡
日南去路始天北殘年載途歸暮春錦衣豈羨故鄉樂綵
服先拜高堂親山屏五色開雀尾海光萬道浮龍鱗還家
信樂送者苦辦有魂夢隨途津相思興會曷有極最是月

夕風之晨遙知溫子卸裝人經過一語煩相詢嶺頭不少
北來使望寄書札來頻頻

張鶴柴招集賦得寒夜四聲

負擔爾何物淒聲絕可憐正逢說餅客坐憶賣錫天跽夜
疑宵警臚名惱醉眠渭城休更唱不值一文錢

賣聲

虎旅傳何早蟬更報漸深敲殘三市月迸裂五更心霜重
聲逾照風高響易沈轉思秋館夕斷續閒清砧

砧聲

不識林中寺誰尋月下蹤潮音初浩蕩塵夢一惺忪古殿
驚棲鶻空壇擾怪松千花真有藏我欲叩南宗

梵聲

水宿愁喧碓村居怕聽春如何近朝市此響亦相從才愧
壘能受身慚庶其傭聲聲殷幃闔遠寺又撞鐘

碓聲

蔣心餘先生齋頭觀范巨卿碑額搨本

憶昔北上經金鄉車轡不捲臥且僵忽如有人促我起道
旁碑書巨卿里慨然懷古雙眼明欲爲一詩迄未成乃今
見此墓碑額似索心盟話疇昔直是生平死友心上作星
芒墮爲石碑穿已失文不完此石亦沒蛟螭淵龍門坊口
披沙得離垢巷中剪燭看心餘先生齋名青龍三年此碑設鄉人
翟循縣君薛冀州事與范史殊名件亦補酈注缺渾淪製
少盤螭痕精堅體仿玉筋文黃初諸刻孰優劣以殿魏碑
差得真文云枯斃潤荆漢治郡威名事奚案世亂方矜獨
行名名高不必循良傳邳君章與邢子真欲爲死友適得
生張元伯後陳平子縱不生交亦堪死不知君死友者誰

身後百年開此碑滄桑不爛西山石陵谷如含峴首悲過
眼雲烟欣落手願抱此碑同石友髣髴空中走素車來共
風前一杯酒慙愧生平結客遊山陽空聽笛聲愁南歸定
下墳前拜埋骨期分土一邱

元夜獨登天橋酒樓醉歌

天公謂我近日作詩少滿放今宵月輪好天公憐我近日
飲不狂爲造酒樓官道旁我時薄病臥仰屋忽聞清歌起
相逐心如止水遭微颿復似葭灰動寒谷千門萬戶燈炬
然三條五劇車聲喧忽看有月在空際衆人不愛我獨憐
回鞭卻指城南路一線天街入雲去攬衣擲杖登天橋酒
家一燈紅晃招登樓一顧望莽莽何迢迢雙壇鬱鬱樹如

齊破空三道垂虹腰長風一捲市聲去更鼓不聞來麗譙
此樓此月此客可一醉誰其此樂獨與清影相嬉遨回頭
卻望望燈市十萬金虬半天紫初疑脫卻大火輪翻身躍
入冰壺裏謫仙騎鯨碧海頭千餘年來無此遊不知當年
董糟邱天津橋南之酒樓亦有風景如茲不古人不可作
知交更零落少年里閉同追歡拋我今作孤飛鶴不知此
曹今夜何處樂酒盡悲來氣蕭索典衣更酌鷓鴣杯莫遣
纖芥填胸懷天上星辰已堪摘人間甲子休相催然藜太
乙遊傍誰吃齋宰相何人哉甕邊可睡亦逕睡陶家可埋
應便埋只愁高處難久立乘風我亦歸去來明朝市上語
奇事昨夜神仙此遊戲

正月見桃花盛開且落矣

紛飛紅雨欲漫天不信東風此地偏才報春來曾幾日忽
驚花落又今年半生每恨尋芳晚萬事都傷得氣先寄語
漁郎莫相過早逃蜂蝶去遊仙

卽事

去年一冬乾不雪亦不雨逮今年正月暄暄似微暑可惜
多裘翁揮汗強服禦頗感造物仁曲貸寒士苦轉恐春氣
回鬱熱肺病舉驗之今果然喘嗽雜噦吐方知天難爲物
微易失所有客南方來異事爲我語官河徹底冰大雪十
日五龜手病老農墮指苦行旅問之百歲翁此景云未覩
我謂客無詫天意固有取煇互宜攙勻坎離要填補陽海

冰反凝陰澤火亦聚雪嶺攢浮蛆炎山搜飛鼠變化爲生
門錯綜乃道戶况生東南人柔脆太楚楚鍊以冰雪威骨
健可搆拄聽言客听然我病亦似愈開窻晒庭柯風色轉
少女將無雨意來中宵一延佇

明日遂雨

昨詩似病天不雨曉聞瓦溝戛玉如方知是物有時有頗
願此聲無處無薄寒繞座聊頓袖細點入窻頻徙書何當
運放舟一葉五湖三江看跳珠

題陸耳山學士家藏明陸文裕公書玉薺詩卷

椒蘭本香草靈均感數化方知騷人旨寓物每多假文裕
名儒臣梗梓比聲價胡於日及花歎詠百從借撫卷一沈

思其笑乃勝罵奄瑾方煽逆中外遭恐嚇一朝出陽曜若

若冰山卸彼瑾何如槿榮落孰久乍公時賦閒居辭氣整

以暇或以喻調羹味可枌榆山谷詩吾聞調槿羹異味及枌榆否或道

生氣易植勝桑柘抱朴子木槿生之易者玉以美其色不比朱顏姸

它年立朝節於此微蘊藉官因桂萼左薦者桂州夏同桂

而異臭物理信堪訝何如玉薺榮一氣任開謝不惟詩旨

深書法亦稱霸奴視趙與董北海斯方駕學士公裔孫清

望擬嵩華亦以文學顯手澤寶籤架招邀皆巨公傳玩引

飛葦一從座後觀斂手起驚詫墨光聚花氣滿堂交激射

袖得餘香歸芬蘊平美清夜

送陳理堂學博歸江南

一肩行李一吟身旅食京華計苦辛草長鶯飛宜逕去石
泉槐火又重新從來易水難爲別除卻江南不算春下水
船中天上坐布帆安穩作歸人

閒坊冷曲共嬉遊漠漠風情似水柔二月濃春過病裏十
年往事滿心頭狂來每倚三分酒別去誰消一丈愁拔腳
輾紅君竟得不辭典盡鸚鵡裘

聞道宣房未築宮下流春汎頗洶洶

時揚州
患水

天心是要江

河合地勢愁當湖海衝莫漫停橈賦花月先教徙宅避魚
龍秋來更獻平渠策好共賢書達

九重

欲換頭銜愛冷官如君無意得來難醉時欲碎珊瑚樹醒

後仍餐苜蓿盤但去莫嫌經舍窄就中差覺宦途寬江山
詩酒須行意好爲師儒一洗酸

送稽立亭歸梁溪

只送人歸不自歸都門柳色故依依春寒未免欺駝褐野
性行當遂鹿菲去路江湖隨地闊到時櫻筍入筵肥爲君
更誦還山樂第二泉邊一浣衣

楊西禾來京話舊且出前年見贈之作和之

一片輭紅地羣公得得來

時聞雅存亦將至

鬚鬢爭我富懷抱爲

君開刻意馴龍性含情守雉媒相期好風日並馬訪金臺
窮天作游記蓋代得才雄餘子空頭項斯人未聞蓬邱齋
今共兩湖舫昔分風竹馬論文地知君感舊同

苦雨

雨腳如絲苦未收涼深五月儘披裘一方坐對堂坳水萬
里心懸瓠子流底事孤螢明入夜最憐百草爛先秋三閒
老屋渾防塌可笑先生不自謀

與稚存話舊

如獲噉夜雁嗥晨剪燭聽君話苦辛縱使身榮誰其樂已
無親養不言貧少年場總刪吾輩獨行名終付此人待覓
它時養砂地不辭暫踏輓紅塵

身世無煩計屢更鷗波浩蕩省前盟君更多故傷懷抱我
近中年惜友生向底處求千日酒讓它人飽五侯鯖顛狂
落拓休相笑各任天機遣世情

題楊鑑亭秋曹幽篁獨坐圖

水竹淮南賞區中靜者緣移來一片月寫以七條絃衣露
淨遙夜檻花敲斷烟因之媚幽獨清影共嬾娟

送韋書城南歸

夜燈分作江南夢看爾風塵竟拂衣湖上酒徒齊拍手一
天秋與故人歸

來歲

鑿輿幸吳會期君獻賦排蒼旻可知車騎重歸客卽是家
徒四壁人

冬夜飲程魚門編修齋觀耶律文正公像

湛然居士心如水八葉東丹老孫子真人已起斡難河佐

命先推撒合里冠金花冠衣只孫丹青囊鄂森有神寶鑑
寒冰出顏色雲蘿草味思經綸西窮瀚海登崑崙角端人
語天回噦雷將不盡付天地身是閩山一片雲巍然遺集
見餘事一代文章占初氣誰知字字華嚴來眞宰填胸偶
游戲萬松野老稱古歡墓門相望松楸寒昔時展墓今展
畫爲結一重文字緣翰林詩仙亦髯叟千載同堂酌杯酒
今髯何必非古髯落落寒空數星斗

歲暮懷人

打窗凍雨剪燈風擁鼻吟殘地火紅寥落故人誰得似曉
天星影暮天鴻

當時置驛起聲名老去傳經倍有情慙愧西游那根矩東

家孤負鄭康成

鄭誠齋先生

小謫陳芳現在身人閒何事做精神幔亭仙客休相待八

百孤寒要此人

朱笥河先生

興來詞賦諧兼則老去風情宦卽家建業臨安通一水年

年來往爲梅花

袁簡齋太史

采石磯頭太白樓蛾眉博望捲簾秋先生暇日時登嘯爲

我題詩在上頭

沈既堂太守

春明門外送征驂別味經年似酒酣昨夜梅花香到枕夢

回天北望天南

溫步容舍人

漢南仙客出羣才綺歲清遊不可陪我在長安反西笑有

人置酒上叢臺

安桂浦孝廉

半載還家路八千珠江何日喚停船天涯亭上如回首可

信長安是日邊

馮魚山庶常

感舊青門涕未收君才端不愧箕裘屈居第二非無意來

歲春風讓舉頭

邵元直孝廉是秋以第二人舉於鄉

河湟俠少常難治關隴流民少定棲料理巖疆抵鄉郡故

人家世本關西

楊蓉裳明府

湖干花月冷鷗波半載清遊不奈何借問襄陽舊風俗可

容載酒習池過

仇麗亭孝廉

絕憶君家草堂月往來帆影動簾紋知君五載杭州住一

夢西湖一見君

左杏莊秀才

問訊樓頭孫子荆早除婦服尙吞聲而今可有三危使碧

海青天萬古情

孫淵如秀才

丙歲孤篷泊京口聞君鄰舫倚歌聲銀箏紅燭三更話風雪江湖十載情

閔季心都司

臺址何年賸可詩嶺名應不罷相思輕紅三百憑君擘莫負閩孃十八時

何數峯上舍

鬪茶燒筍味同諳愛說詩僧是野蠶手種庭前雙桂樹一

天秋思古淮南

孫吟秋上舍

君之嶺嶠我燕游北雁南烏兩地愁可惜白雲尖上月兩家樓閣十分秋

蔣良卿布衣

負笈輸君學是遊移家增我病兼愁仙山九曲經過處識得迴腸似此不

陳菊人上舍

故家庭院水般清
手撚花枝一笑成
乍見還驚卻回顧
不恆風調太愜生

烏絲闌格鼠鬚描
愛我新詩手自抄
莫怪年來拋韻語
此生無分比文簫

臘月廿五日飲翁學士寶蘇齋題錢舜舉畫林和靖小像用蘇韻

一枝梅折孤山麓
冷浸銅瓶汲湖淥
卽此便是逋仙魂
變現花前貌如玉
此花只合先生詩
便著言詮都絕俗
玉潭妙手爲寫眞
五百年來閱風燭
石几生雲氣尙温
吟眸點漆神逾足
一童一鶴猶依依
詎是無情拋骨肉
妻梅謾語如可憑
清供家山問誰錄
後人但賞疏影詩
誰知別有相

思曲

堯山堂外紀載林惜別長相思詞注云林洪著家山清供云先人和靖云云卽其子也乃喪偶未娶爾

老去高情寄託深幾株畱伴墳前竹何當喚起圖中人茗
話寒宵淪甘菊

又用前韻題翁覃溪所摹和靖秋涼三君二札

放鶴空亭倚孤麓殘梅零落湖波淥寥寥遺墨在人閒不

共沈薶一簪玉

楊璉僧伽發公墓但玉簪一枝端硯一枚

三君八郎知阿誰得

識此公皆不俗念友期聽烟寺鐘聯遊遲剪風船燭菱角

少許致不難寄錢二索愁未足

札中語

尋常語妙書更道此

亦何羨西臺肉學士雙鉤宛入神詩境停雲互收錄鬚眉
彷彿想見之歸臥夢繞西湖曲空山無人獨立久夜深似
有風敲竹乞摹萬本映窗光洗眼新泉浸寒菊

小除日經廠市見王叔明畫愛不克購歸以志懷
長安幾人愁歲逋誰耐齷齪看妻孥市中鴿炭白金換廟
上爆竹青紙糊紛紛景物百刺眼瞥見水墨江南圖尾鈴
猩脣叔明字心知其是焉可誣藏古篆法意慘淡備諸皴
妙胷錘鑪青林杳冥翠竹暮更不著人聽鷓鴣一重一掩
自開合萬壑千巖知有無借問主人沾不沾氣所不足辭
嚙嚙烟雲過眼沙脫手不知去落何人廚歸來嗒然欲忘
我急喚墨汁書門符

元日大雪疊前韻

昨宵連巷喧索逋我亦瑟縮羞妻孥朝來抹眵忽失笑一
天快雪雲模糊九重闔闔玉爲闕千門闔闔天開圖三元

節見三白瑞田公嚇嚇言豈誣蟣臣稱賀孰爲達亦感鼓
鑄隨鴻鑪端坑呵凍暈鸚鵡閩蓋試茶溫鷓鴣不令俗物
擾清供只除哦詩一事無亟謀歲飲傾市沽家人圍坐言
咕嚕閉門一任燒連寢隔舍或驚烟起廚果然一醉萬愁
失不用辟惡新桃符

初四日復雪余少雲以和詩來卽疊韻奉答

和詩火急如償逋竊笑不暇嗔癡孥燈殘漏盡雪屋白有
似不著窗紙糊豈其飢吟坐真癖亦省僵臥誠良圖牆頭
前雪望後雪聞古老語今非誣諺云牆頭一條白前雪望後雪知君渾舍
有同賞榼拙熅火圍地鑪兩家北上逐鴻雁一心南飛隨
鷓鴣恢疏在骨合憔悴緩急叩門誰有無不如放溜下直

沽舟人醉語同話。嚙了知浮世等蓬梗。安用盛名爭顧廚。
泥乾相訪出詩笑。我歌定與君同符。

憶西湖

舊遊最憶是西泠。鏡裏雙高未改青。見說穿雲開葛嶺不
殊。洗石出南屏。幾番金碧春邊換。何處笙歌月下聽到死
不傳。封禪稿。斯人風節故亭亭。

人日登黑窯廠歸集翁學士覃溪詩境齋

一放登高日始知。塵海深天留數峰。雪雲閣半城陰苑樹
春還寂。齋鐘暮已沈。今宵有高會。歸路遶寒岑。
酒從詩境得韻比。草堂清豔以三陽。節分來七寶。羹千秋
欣有託。一飽詎忘情。何必梅花發。江湖思已盈。

元夜獨坐偶成

年年今夕興飛騰似此淒清得未曾強作歡顏親漸覺偏
多醉語僕堪憎雲知放夜開千疊月爲愁心暈一層竊笑
微聞小兒女阿爺何事不看燈

圈虎行

都門歲首陳百技魚龍怪獸罕不備何物市上游手兒役
使山君作兒戲初鼻虎圈來廣場傾城觀者如堵牆四圍
立柵牽虎出毛拳耳敢氣不揚先撩虎鬚虎猶帖以梃卓
地虎人立人呼虎吼聲如雷牙爪叢中奮身入虎口呀開
大如斗人轉從容探以手更脫頭顱抵虎口以頭飼虎虎
不受虎舌舐人如舐穀忽按虎脊叱使行虎便逡巡繞闌

走翻身踞地蹴凍塵，
全身抖擻花錦茵。
盤回舞勢學胡旋，
去似張虎威實嬾人。
少焉仰臥若佯死，
投之以肉霍然起。
觀者一笑爭醵錢，
人既得錢虎搖尾。
仍驅入圈負以趨，
此閒樂亦忘山居依。
人虎任人頤使伴，
虎人皆虎睡餘我。
觀此狀氣消沮，
嗟爾斑奴亦何苦。
不能決蹠爾不智，
不能破檻爾不武。
此曹一生衣食汝，
彼豈有力如中黃。
復似梁鴛能喜怒，
汝得殘餐究奚補。
偃鬼蓋顏亦更主，
舊山同伴倘相逢，
笑爾行藏不如鼠。

題翁覃溪所藏宋槧施注蘇詩原本

卽宋商邱所藏本後歸查

白初

注蘇之難如注杜，
誰識良工最心苦。
永嘉本已芻狗陳商

邱刻擬景星觀終愁綴葺或失真遺辭浪說由儀補天吳
紫鳳一倒顛星宿崑崙孰洄溯廢書神遊嘉泰年漕司善
本落何所誰知好物如龍騰六合翱翔擇其主歸然靈光
歸寶蘇齋名初白菴中此先貯率更楷法久更新施顧同時
一機杼詩外有史史可增何必蟲魚鬪箋詁絕識博學兼
歷年能事無慙劔南序更從缺簡追混茫益歎今傳多錯
近古人所有不盡有補之以臆毋乃魯查田謾說能訂謗
但存其舊不猶愈功臣玉局自有真益友吳興究奚取興
來竟欲家置編化千萬億光氣吐不令此籍遭泥蟠一爲
詩生洗腸腐公如有意付木工乞附姓氏公其許

花朝程魚門招飲分賦蘭得花字

光風轉綺席雜卉明繁葩中有空谷姿欲花猶未花移來
自唐窖廟市分其芽植根賴淺土障塵施薄紗試問山中
時有此風味耶幸入善人室不殊幽士家依依壁閒影灑
灑杯中霞孤賞欣所託遠思靡有涯陶然盡餘酌歸袖花
風斜

趙渭川至卽題其紀游詩卷

三年詩破笑萬里客排門衣卸雲千嶂譚傾海一尊疊成
新鳳曲招得古梅魂昨夜思君夢羅浮掛月村

桂未谷明經以舊藏山谷詩孫銅印見贈

我友曲阜冬卉子六書摹印真吾師鑄金同用范沙法顛
倒斯籀同兒嬉柳閒鍛竈每相過篋中字書隨所攜脫囊

贈我一銅印精絕審是潑蠟爲朱文字減土數一彷彿西
江派中人所遺不然卽是吾家子畊紹谷輩云山谷孫系
以詩鸞翔蚪結一入手我欲拜賜心然疑我祖詩可祖天
下凡能詩者宜當之若資華胄便竊據不患造物嗔吾私
雖然一語敢相質斯道不絕危桑棋文章千古一元氣支
分派別徒費詞幾人眼光認鍼芥學者蟻附緣條枝雄深
一變爲釘餽精華已竭存糟醜康莊不由入鼠穴細尋牛
毛披繭絲強將譜系溷初祖九原可作夫誰欺摩圍派衍
源屢竭皖公雲封人莫窺我生衰門更才劣豈有筆力能
振支但將此印印家集一編世守儕尊彝北平學士譚今
巨手後先心印無差池李洪之編任史注薰蕕灌露窮搜

披掃除荆莽出光燄我翁斯文今在茲不信請將我言質
報贈愧匪瓊垢辭

送邵元直南旋

五年心跡感雲泥再世交情惡別離聚散不妨成小劫升
沈無計可前知只宜東野聞猿慣誰笑歐陽賦燕癡寥落
酒旗歌板地不堪君去我遊時

未谷以漢瓦并天下文搨本屬題

一篝火起狐鳴野三月阿房土花赭卻畱餘燼在關中燒
出未央宮上瓦其時天下方匈匈銅鞮之北平城東歸來
金碧一照眼雙闕屹峙天當中按劔一怒隆準公鄧侯數
語天回容此曹相從布衣起望氣久已知雲龍宮成何必

天下定以耀萬世威無窮此瓦團團不盈尺四字篆文隨
瓦合多少中原逐鹿人若見此文同一泣蒼然古製踰香
姜何論急就兼凡將會共朝霞映金齋不隨夜雨飄鴛鴦
豈無萬壽長生字看來無此英雄氣離宮百四空斜陽殘
本淒涼出都肆知君好古一世無摩挲舊揚意有餘更披
三輔黃圖錄補入西清古鑒圖

兩當軒集卷第十五

武進黃景仁著

古近體詩五十一首

言懷和黍維

不與黃金不與聞我曹無計破天慳半生骨相慙分芋五
載鄉心只放鷗好景漸消頭上月片雲常護夢中山可知
來日愁無益且讀離騷晝掩關

移家南旋是日報罷

朝來送母上河梁榜底驚傳一字康咫尺身家分去住霎
時心跡判行藏豈宜便絕風雲路但悔不爲田舍郎最是
難酬親苦節欲箋幽恨叩蒼蒼

直沽舟次寄懷都下諸友人

幾年橐筆走神京，賸有扁舟載月明。
掉首已拌遊萬里，懷人猶是坐三更。
座中許郭勞聲價，市上荆高識姓名。
消得向來塵土夢，被他柔櫓一聲聲。

讀書擊劍兩無成，辭賦中年誤馬卿。
欲入山愁無石髓，便歸舟已後蓴羹。
諳成野性文焉用，淡到名心氣始平。
長謝一沽丁字水，送人猶有故人情。

舟過楊柳青感舊

此地尙餘楊柳青，昔年獻賦記曾經。
龍舟鳳艗雲中見，廣樂鈞天上聽篴。
裏宮袍猶自豔，夢中綵筆竟無靈。
阻風中酒情何限，目斷孤鴻下晚汀。

滄州晚泊

清風樓下喚停船
頓袖篷窗思惘然
不見中條徵隱士
空懷東海挾飛仙人
同聽雨誰千古
天放看山又十年
滄酒一尊聊自醉
烟波前路正無邊

吳橋

一川百折似蛇枉
越舸吳舩日來往
輕帆片片白雲飛
小市嘈嘈語聲響
正是鄉心暮更朝
客程無那說吳橋
非無繫棹雙楓樹
亦有當窗萬柳條
風景雖然似吾土
只共平頭作鄉語
一種懷人去國情
可堪愁水愁風苦
沙鷺驚人撲淥飛
濺來涼雪滿征衣
少年江海貪爲客
何日風塵竟息機
眼看鄰舟掛帆去
未識今宵泊何處

德州懷汪劍潭

三兩初明野戍星，鼓聲催權向津亭。
漸驚齊語烟中出，尙怯燕歌夢裏聽。
岸柳漸消愁鬢綠，市燈猶照故衫青。
前游記有汪倫在，歲暮相依作客星。

董子讀書臺

廣川紹絕學，命世伊呂儔。
對策未竟用，說災行見收。
遂令王佐才，老遂經生游。
東海牧羊叟，乃是平津侯。
方以曲學顯，亦曰治春秋。
再遣相驕王，不異豺虎投。
爲問東閣門，磬折何所求。
一上丞相書，未免經術羞。
幸哉盛名下，猶得遂首邱。
差勝洛陽賈，作賦沈湘流。
經過下帷處，高臺列松楸。
感激士不遇，此意良悠悠。

平原

風塵想像出羣才
公子平原似掌開
馬磨牛醫天下士
買絲今日繡誰來

三千靜塞擁登壇
失計平原棄郡還
河北淮西同一死
白頭泉路愧常山

禹城

禹跡茫茫代幾更
古堤崩剝勢如城
九河故道都磨滅
何似人心總不平

耿渡

朝發齊河驛
乃道耿濟渡
飛梁破長烟
斷岸積陰霧
萬弩奔流攢
如挾鼓聲怒
當年耿伯昭
懸軍此飛度
一鼓拔祝

阿轉戰得張步掃平三百城主道開東路以比韓淮陰文
叔言非誤落落難合人功名在遭遇風雲鬱沈薶川陸莽
回互懷古心悠然停車一延伫

歷城道中

北游忽不樂東來攬齊岱陸盡燕趙交水送汝泗會只有
清濟源伏流隱支派亦如古達人心跡有時晦羣山盡朝
岳敢向不敢背峩峩靈威丈指我青霞外返客遣片雲飛
來若車蓋揮手暫相謝冰霜迫徂歲遊倦思小休勝濟行
未艾寄語雪中花石上勞相待

望匡山

白也書堂在雲林似昔時星辰如可接猿鶴尙餘悲去作

青山塚歸虛白首期憐才意千古高咏少陵詩

十四夜宴程澈江學使者座

僕夫勞夢破昔昔酒醞歌圓忽今夕亥爲屠肆鼓刀人甫
也諸侯老賓客少年去我何堂堂對酒當歌吁可惜若論
當時意氣場奉誠子弟皆頭白西京絕技擅郭張南院新
譜翻康王千金共說鹽爲笑一曲能回木作腸但使人生
皆此夜不知何處是它鄉筵前按曲誰前輩無復何哉故
人在又是當場一輩人參軍蒼鵠紛成隊君不見鄒生一
徹悲楚懷公子亦爲雍門哀此閒行樂豈歎所且開笑口
呼杯來答刺稜登一聲歇樓前惟有茫茫月

謝程石緣餽梨

結友須快友食果須快果分君口頭甜沃我心上火經秋
況病肺蒸食無不可元關溢華膏舌本粲蓮朵承囊出漢
殿包箬飛吳舸何如秋白佳冰雪覺碎瑣腴奪金蠟九脆
壓頰蚪顆雅不羨回甘甘回舌先鎖徒然負盛名其實則
么麼此語勿告人或者唾罵我飽嚼聽松風何似在塵堦

泉上

濟出地爲澗百竅飛名泉初疑地脉碎誰識天機全蕩搖
烟靄珠碧暈激漱風石箏琵琶田仙被倒晴翠映帶密
樾交漪漣千頭魚戲影戔戔一足鷺立姿翩翩宛然發興
在濠上卻笑莊惠多言詮世上小兒強解事分次甲乙爭
喧闐誰知清濟一而已泉自不語流涓涓長瓶大甕日來

汲幾輩飲水知其源我家住近二泉側愛聽蚓竅松風前
區區較此但百一便擬買宅居窮年手攜桑苧經一卷日
日來放編魚船

華不注

卓地青蓮忽千仞虎牙森立羊腸紆更無山附始知峻尙
許客登何患孤壯士三周解鞬戰謫仙一去荒齊都試從
絕頂俯下界便是匹練叢花圖

題曾約菴雨中海棠

紫棉初綻錦纈紛曉靄廉纖浴絳雲帶溼尙堪春一國暈
潮猶長去酒三分輕陰乍許飛章乞沒骨從教着露勻省
識扶紅意辛苦好將顏色報東君

使院堂陰奇石昔人題之曰石芝

當階忽雲根現出九華小纒如翔鳳鸞不敢下凡鳥松胎
孕星星岳色浮了了一穴通仇池三峯接蓬島何人題石
芝積蘚勤剔掃尋名轉愕眙欲摘屢傷爪朱柯肖輪囷華
蓋狀糾矯紫翠撲人來靈光燭霞表豈惟倒海岳或恐下
商皓頗笑玉局翁夢境殊艸艸何如此庭中一日百吟繞
倘有煮石方那患熟芝老急喚金鴉鋤吾方待之飽

鮑叔祠

誰道人心不可淳此公祠廟至今新能知有母真良友若
解分財已古人倦客飽看翻覆手短歌聊當送迎神略嫌
慷慨龍門筆尙有恩仇氣未馴

濟南病中雜詩

于世一無用，向人何所求。
匿名屠販下，伏枕海山秋。
遠水通鷗思，長雲落雁愁。
微軀等蓬累，隨處足勾留。

肺病秋翻劇，心忡夜未寧。
聰明消患苦，書劔易參苓。
此子久傷氣，何方解鑄形。
輔車猶可識，決日向繁星。

車吹喧都會，幽居此靜便。
支牀無醜石，繞砌得名泉。
地冷荒秋夢，林空淨夜禪。
短檠常照我，蕭颯竟中年。

志怪心猶喜，談經氣已平。
遙尋海上客，長謝魯諸生。
識字真多累，爲儒例合輕。
未應伏阜馬，猶作夜深鳴。

夢北醫難覓，圖南計總隳。
浪游人海去，空入竇山迴。
劉蛻文成塚，君苗硯已灰。
中庭撫枯樹，太息此琴材。

李杜清游在風流杳莫希斯人如未死吾道詎應非北渚
沈寒潦南山冷翠微空餘昔時月永夜滿征衣

小住猶爲客吾生亦已勞補窗驅野馬洗壁畫離騷澹日
寒逾瘦孤雲懶不高何因挾枚叟同話廣陵濤

偕石緣遊歷下亭

城外青山城裏湖七橋風月一亭孤秋雲拂鏡荒蒲芡水
氣銷烟冷畫圖豈甫名游誰可繼頽杭勝蹟未全輸酒船
只傍鷗邊艤攜被重來興有無

庭下有泉卽珍珠泉入明湖之過脈也

跳珠濺雪碧玲瓏磬石迴欄錄曲紅忽現滄溟池沼內欲
迴天地桔槔中明河影向三霄接清灤源知一脉通咫尺

名湖輸不盡可知有本是無窮

雪中飲四照樓卽席呈程端立學政

彤陰閣簷雀啄枝客懷鬱邑無由奇樓頭快意忽此酒飽
看玉戲天公爲八窗洞開萬井寂羽原灰野浮參差舜田
忽攝雲外去鵲華雨朵相蔽虧公然奪我四山翠但與清
氣通絲絲明湖百頃不可辨隱約凍澈青琉璃更無纖芥
礙眉睫時有冷光浮閃屍仙乎此樂不可極狂來欲叱銀
龍騎不登此樓凡幾日儻忽變態誰能知梁園數子各雨
散聚星堂客皆雲馳悄然念舊不成醉主人款款浮深卮
因思此樓初建時一時觴詠推南施我公文彩迴相映山
左復見河汾師

薛文清視學山東諸生稱爲河汾師

玉寒冰瑩山氣象鹿巾

鶴擎仙丰姿愛攜賓從宴清暇不廢輕樸借追陪斯遊直
可韻千古暖寒會上真兒嬉明朝定發郢中唱敢以寸鐵
當雄師

得吳竹橋書趣北行畱別程端立

乞食江湖客慵書館閣身行藏聊自點歌哭向誰真未捧
毛生檄難辭庾亮塵此行吾豈意可奈尺書頻
暫作平原客頻傾北海樽半甑分謝朓一榻下陳蕃迹
才齊右衝寒又薊門將心託鴻爪到處一畱痕

別岱

岱爲五鎮首禮秩崇三公是有軒冕氣不與尋常同所愧
賤士醜欲往知無從遷延一彈指便絕風雲蹤咫尺成迴

車有累寧非窮空吟望嶽詩遙憐杜陵翁天門展映蕩古
與人境通我自不能到缺望將毋憊回首仙臺雲去路爲
我封未死尙可復多言神吾恫

望鵲山

盤輦出郭二十里向客一峯如鵲起傳聞中有扁鵲祠草
木至今猶未死禁方一卷世不存地上多是強死人祖洲
大藥不可得令人長憶長桑君

河堤

客行迫歲晚憂端耿非一鐸聲破殘夢攀幃忽如失道經
古河堤奔駭勢難述人從釜底行車自日中出崩崖如雲
頽斷岸擬劔刺衝嚙餘沙痕詭醜狀怪物試問馮夷神何

年徙其宅故道已荒芒形勢猶彷彿想當疏鑿時羣靈受
搗叱陵谷身後事古聖不能必至今地不耕礲确石其質
徒然怖行旅往往遭顛躓懷古心方長出險走逾疾回首
浮雲陰蕭蕭下西日

渡運河

喚渡高城下斜陽澹一川舊遊仍北上親舍已南遷雁笑
衝寒客雲迷望遠天離波逐思淚流得到門前

車中雜詩

天寒行旅稀語問浣花老我見殊不然勞人多草草前車
接後車魚貫爭古道行色或輝煌形容半枯槁是各有室
家亦豈無翁媪置酒亦足娛塞壘詎不早而必衝寒行風

叢犯昏曉我亦廁其閒軀比一粟渺何意號寒蟲轉作流
離鳥一貧能驅人環顧憂心悄

十室或爲堡三家亦成村賽社鬧鵝鴨趁虛喧蝨蚊此鄉
今年豐民樂氣自淳何乃塗路閒雁戶紛成羣扶攜雜老
穉負擔兼瓶盆奔號乞一錢遮攀礙雙輪人飽爾獨飢歲
富爾亦貧或爾愛游手不肯爲石民叩之旁人言乃異吾
所云此曹農事畢耕作待發春乞食非本意聊以度蕭辰
聞言爲失笑可喜不足嗔我錢苦易盡爾術亦已新謀生
固多道各荷皇天仁

除夕述懷

我本江海客風水性所諳爭食雁鷺侶眠飯蛟龍潭吳山

及越水到處工幽探強來北地遊埃壘積不堪傭書讀中
秘逐隊趨趨煙海迷津涯十不憶二三欲投祭酒筆骨
相慙燕頷平慈親迫榆景髮脫難勝簪迎養薪桂地所愧
孰旨甘斜街路南頭因樹三間庵老人弄孫罷繡佛依香
龕昨來秋風起語我思江南片舸下澤潞家具不滿擔拜
送心斷絕而我羈歸驂有兒名一生廢學增癡憨曾不識
之無但索梨與柑有女已上頭長欲與母參心性稍姑慧
恨渠不爲男俯仰既無藉出處彌自慚薄遊向齊岱聊寫
憂心憐一看封中雲快聽海上談懸車待春發陟岳搜穹
壘日觀俛滄海天門豁層嵐捫碑倚石表發策開玉函誰
知靈威丈赫爾嗔其貪仍復驅我來臥病同僵蠶努力近

藥物割嗜疏酒飯一豎維虛耗環伺何眈眈昔年壯意氣
萬象供嘲哈今如病馬伏不任驅驂驛面用方麪障口擬
石闕含亦有舊攜劍鏞澀昏星鐔亦有幼讀書塵封飽魚
蟬一僕窮相隨膚癬鬢毳毳作字遣之賣易菜日半籃縮
頸向爐火暖意偷春酣忽訝歲云盡淚下衿衫渾轉憶去
年夕渾舍談話誦索逋雖填門相對樂亦湛今反作孤客
枯寂同瞿曇百感自然集苦吟詎所耽願影坐分歲漸聽
晨鐘鐺

題余少雲蕭寺吟秋圖

去年九月我別君城南古寺夜打門酒寒燈瘦話徹昔秋
聲但覺不可聞今年揖我街西館脫手新圖水初剪樹樹

西風葉葉秋迸作商聲落吟卷我攜襪被來結鄰蕭然二
月無好春花無一枝樹無葉豈獨秋風能惱人瀟灑雙丸
此愁送壞塔殘碑日摩弄優鉢香中共佛燈摩尼燄上分
僧供百年聚散只須臾此景他年不可摹更回蕭寺吟秋

筆爲作蒲團看劒圖

時方屬
作此圖

題明人畫蕉陰宮女卽次徐文長題詩韻

記調絃索侍深宮手種芭蕉綠幾叢行過蕉陰卻回顧美
人心事怕秋風

借伯扶少雲遊崇效寺卽贈寧上人

唐建舊名
棗花寺

春雲開積陰三五挈遊袂病餘散腰腳討春得意遠松
車蓋形徑造松下寺寺古無丹青地僻尠車騎棗花錫唐

名田盤印初記畱詠多前賢展卷墨香醉頗怪竹垞翁舊
聞闕編次老僧喜客過高談足清思支郎既該覽惠公亦
強識千花繙大乘五家闡精義獨於南頓宗別樹一旗幟
孰云成象龍而必離文字夕陽轉空廊竹栢影滿地欲別
掩勝賞彌畱愧塵累送客齋磬涼泠然出空翠

題洪穉存機聲燈影圖

君家雲溪南我家雲溪北喚渡時過從兩小便相識白楊
頭望何安居辛夷樹訪迂辛宅君言弱歲遭孤露卻伴孀
親外家住塵封蛛網三閒樓阿母悽涼課兒處讀勤母顏
喜讀倦母心悲不惜寒機杼千帀易得夜燈膏一甌燈滅
尙可挑機斷不可續樓風刮燈燈一粟書聲機聲互相逐

屋角時聞鄰嫗愁烟中每撼林鳥宿老漁隔溪住十年君
家舊事渠能言打魚夜夜五更起蔣家樓上燈猶然卽今
此景空追溯蓼莪已廢白華補寫聲寫影工則能難貌孤
兒此心苦如君獨行世無匹謂我知君一言乞君名已達
薦賢書毋傳應歸赤心筆我慚腕弱何能任忽復思淚沾
盈衿畫中咫尺逼親舍南望白雲千里深未能一笑酬苦
節空此春暉寸草心剪燭題詩意無已急付橫圖捲秋水

放鶴圖黎二樵爲周肅齋明府作屬題

二樵筆如鐵裏綿愛畫獨柳秋灘邊枝枝葉葉帶風色坐
令山水生清妍一琴一鶴一童子使君宦況清如此呼童
放鶴拏舟行淡淡斜陽天拍水其人與畫皆千秋令我悄

然思舊遊梅花夜舫孤山寺芳草春江鄂渚樓

題李明府天英借笠看山圖

一江萬山閒雨勢挾舟入中有看山人坐借長年笠錦石
丹崖望不分沙迴樹靡追何及十年夢與桐君期羊裘釣
客空所思七里濤分灘上下雙臺雲隔路東西此閒我亦
推篷慣恨不相逢借笠時是物等閒難得戴著屐何如放
船快君與東坡兩蜀人披圖似有英靈會祇今插腳輭紅
塵清景都從畫裏親年年穩坐滄江雨畢竟輸它笠主人

惱花篇時寓法源寺

寺南不合花幾樹開春冠蓋屯如蜂遽令禪窟變塵衙曉
鐘未打車隆隆我時養痾憊僧舍避地便擬東牆東花開

十日不曾看鍵關不與花氣通漸驚剝啄多過客始覺門
外春光濃數弓地窄苦揖讓一面交淺勞過從翻書奪席
苦拉邇應門煮茗煩奴僮因花致客真被惱求寂得喧毋
乃窮斫花徑擬借蕭斧深根鏟斷繁英空不然飛章乞猛
雨使李褪白桃銷紅不憂人譏煞風景焚琴煮鶴寧從同
花如顧我啞然笑雜以諧謔通微風爾今窮瘁實天子豈
有生氣回春容無人之境詎可得徒使冰炭交心胸非人
誰與聖所訓有怒不遷德則崇去畱蹤跡孰相強曷不掉
臂空山中同生覆載各有志我自開落隨春工客來客往
豈有意而以罪我徒徧衷對花嗒然坐自失何見不廣儕
愚憇明當邀客坐花下爲花作主傾深鍾焚香九頓法王

座祝客常滿花常穠

馮魚山張粲夫洪穉存安桂甫余少雲同集寓齋
爲餞花之飲得餞字

今朝百事從屏遣一飲無名借花餞春藏佛地晚更濃客
惜芳時會頻展入杯一片意已醺鋪徑重茵坐隨選繡旛
微裊星辰閒錦幕不張蜂蝶善高談欲下曼陀羅結習詎
了摩訶衍我今示疾倏衰颯公等逢歡宜勸勉明當闔闔
謝羊欣門外香泥愁踏踐

送邵元直歸里卽題其享帚樓

人去兼春去今年似舊年半酣休斫地一第比登天世業
書充棟歸裝月滿船連牀十年事話到燭花偏

憶昔君家訪高樓
琴水陽簷飛山雨
翠簾捲海雲黃百尺
歸堪臥千金願
易償贈行聊壯語
傳世有文章

兩當軒集卷第十六

武進黃景仁著

古近體詩三十首補遺十九首

出都過蘆溝橋

九馗車馬暮駸駸
幾曲渾河落日陰
來似閒雲去流水
此橋原不變人心

張桓侯故里

小店猶名義居民
半姓張時時有雲氣
往往接樓桑古井
輓轡咽叢祠
栝柏蒼英姿
見矛馬無命亦堂堂

安肅道中

小邑如村落
飛花送客鞍
菜租田上價
柳禁路當官
古調

憐車鐸鄉心負釣竿
郎山青未了誰與盡情看

荆軻故里

一擲全燕失悲哉壯士行盜名原不諱
劍術本難精市筑憐同伴沙椎付後生
魂兮歸故里易水尙風聲

曉發保定

殘月未沈山啼鴉初起樹已有馱鈴聲
郎當過門去馬嘶人起何怱怱
高城鼓角猶隱空壓寒幾盞蘆葦酒吹夢
兩行楊柳風自過涿郡辭燕地路指神京
哄車騎大道青樓望鬱葱
碧波錦樹交空翠蒼莽初無冀
北風冥濛卻有江南意
江南行客行未休碌碌趁人何所求
暫時快眺亦神王何必車前有八騶
車聲歌聲相聞作今日方知曉行樂

堯母廟

百里見堯山刺空出青峭行觴第一泉得謁堯母廟制擬
茅茨餘器惟蛻土肖丹陵緬鬱盤黃雲想焜耀伊耆雖載
遷慶都不殊號都山望堯山離立若壺嶠母望子曰慈子
望母曰孝至今兩山閒雲氣相繚繞悵觸遊子心蒼茫獨
憑弔

定州道中

垂鞭信馬未知還古國鮮虞指顧閒北去雲埋秦上谷西
行路出漢中山草無斷綠難分樹山不停青直到關待覓
壚頭干日酒月明沈醉唱雙鬢

真定道中

風色大旗上雲開見堞樓亂山來北岳遠樹出并州客意
欣槐午農情慰麥秋滹沱仍喚渡驅馬思悠悠

獲鹿

入陘程第一過嶺險多般笠影斜懸日鞭梢響徹山鹿泉
流泱潏石邑路間關更訪淮陰廟殘碑拂蘚斑

龍窩寺

眾山如奔湍忽復作渦旋疾激得盛怒盤回若餘眷其所
縈結處意象百錘鍊哈呀狀崩城缺巒肖斷堰陰崖慘鐵
積陽岫條霞絢梵宇蜂房懸僧寮蟻珠穿雨溜壁壓簷風
動石當面愕眙森動搖獨立訝變眩名山界衝衢淨域等
郵傳火地青蓮開窮海寶山現鐘聲不破迷茗飲聊紓倦

去去那復留身如脫弦箭

核桃園夜起

夢回小邑一燈紅四面腥吹草木風身似亂山窮塞長月
明揮淚角聲中

井陘行

東風吹車入土門井天一線愁羅屯俯驅鼠穴仰蚰蟻千
巖萬壑相吐吞重關虎踞三十六參井歷歷手可捫我生
不識秦關蜀棧之險絕對此已欲墮淚銷驚魂東襟莽幽
冀西距雄并汾中間一束作天險古來戰鬪何紛紛我所
思兮韓王孫悲莫悲兮安成君一言不聽左車計舉趙一
擲殲其軍空餘恨血泝水上千秋嗚咽流渾渾至今羣山

猶作背水勢深林巨嶂似有赤幟屯如雲嗚呼王孫兮王
孫爾能被趙方朝飧井陘之險爾可談笑入一婦人手繫
爾同驪蹕世途夷險那可道功名成敗安足論蒼茫落日
滿山谷終古誰怨誰爲恩離禽駭獸自來往懸崖激澗磨
朝昏卻畱遺蹟慘行旅十步九息愁崩奔清時地險亦徒
設盍借巨鐵劔雲根今宵何處息勞夢半嶺上有三家村

固關

天與雄關鎖晉陽嚴城岩帶接邊牆水兼縣蔓渾流合山
接黃榆惡嶺長關吏頻年愁歲課戍兵終日臥雲光前途
更在鳥飛外何似驅車度太行

舊關道中

峯尖木杪趁行輶，悽苦樵歌逐澗流。
漸入山深猶趙地，直從天上望并州。
將軍壘畔閒雲散，娘子關南暮雨愁。
悵眺不知身在險，前旌已下亂岡頭。

女媧廟

繼王雲爲姓，神媧女是皇。
職婚勦太昊，正系紀承匡。
在昔金行慘，因之水勢張。
滔滔翻地軸，洶洶墮天綱。
柱訝不周折，都愁中冀荒。
惟靈驅颯爽，悉力靖披猖。
異族投窮野，中皇兆發祥。
蛇身蟠上下，鼈足奠蒼黃。
煉石言非誕，屠龍說詎盲。
捫虛填氣核，鑿空逗天光。
蹟闕爭開闢，功高接混茫。
空山餘插竈，破廟枕平岡。
像設丹青古，春秋祭饗忙。
東西兩浮化，煙靄自蒼蒼。

青玉峽

急峽東山轉危崖蔽日長片雲迷出處羣玉儼鋪張石很
羅人鮓泉清涌帝漿孤猿一悲嘯過客盡沾裳

柏井驛

石砦荒涼古路封回頭林翠合千重煙銷始見峯圍驛風
定方知寺有鐘亂石似羊空臥草片雲如鶴不棲松恩恩
小憩仍催發雀躍狂遊意漸慵

平定州

驅車下嶺豁雙眸木末遙明鼓角樓不少亂山圍遠障卻
開平野受雄州雲流桃水千灘雪風動榆關五月秋好去
憑虛倚高閣回看城郭也銷憂

曉發芹泉驛

鴉兒峪水繞山回，纖月疏林曙色催。
誰與高堂寄消息，此身已度井陘來。

壽陽

馬首遺封在羊頭，古寨平雲深一邑。
冷俗云冷壽陽地僻眾泉

清惟壽陽水獨清石角分成路，山腰束入城。
韓碑何處訪，悵不

勝情

暮投要羅寨登西嶺

上嶺復下嶺，出關復入關。但愁繭足萬山裏，未得迴眺層
峯巔。茲山峯完陡雲上，俯視羣嵐盡孫行。夕陽明滅紫翠
開，茫茫欲逐天風颺。北連恆岳南太行，三晉河山屹西障。

回頭卻望中山東已隨一氣浮空濛直從飛鳥不度處而
我掉鞅過其中有如航海得洲鷗轉眄颶風鱷浪心忡忡
平時看山陋西北絕少幽靈但雄特今逢此景知昔非欲
賦登高愧無力嗟余羸病困緇塵但得壯觀情許親肯爲
山多怯行路行看終南華山去

榆次道中

大道入雲平高槐夾道生出山驚馬瘦行野覺身輕俗重
好妨養風餘蟋蟀賡迢迢晉陽路汾水向人橫

晉祠

懸甕之山晉水出濛石穿沙氣蕭瑟地古時生喬木煙雲
開或漏蒼崖日成王介弟唐叔封我我象設瞻閟宮千秋

遺澤雙流玉兩晉名藩一葉桐神堯開國乃其後怪事亦
傳文在手義旗電捲入長安曾禱祠堂得神佑太宗手書
貞觀碑紀年至自征高麗鏃金戛玉頌功德意氣絕似歌
風時金輿羽帳今何在惟有此泉常不改千畦流潤活并
州百道飛煙入汾水壅渠智伯貪天功趙家乃用平河東
誰知清絕濫觴處廢興不到空山中飛梁雜樹交縈互風
景還如道元注心空祇覓閒鷗盟坐久能知白魚數女郎
祠廟何年開反使正祀荒塵埃若論世久數宜簡古廟何
以存臺駘紛紛世俗誰可告乍許追歡莫憑弔爛醉千觴
且未休不然卻恐青蓮笑

夜宿朝陽閣感懷龔梓樹

叔虞祠下垂楊滿空翠堆中咽絲管夕陽人散廟門關惟
有鳥聲啼宛轉回首閒雲步山谷一燈自上西巖宿推窗
百里望川原晦靄冥濛辨汾曲嶺頭月落星光昏風景可
憐思故人空山唳鶴掠簷過彷彿似挾平生魂當日思君
此游冶白袷春衫制都雅一剪眸橫山翠開數聲歌遏泉
流瀉題句空畱碧玉欄舊游不見青驄馬我後君來已十
年我來君已歸重泉水聲似咽鄰家笛雲影疑分夢裏箋
人去人來空歎息待人惟有青山色畱語青山問來客不
知我去誰相憶

徐溝蔡明府予嘉齋頭聞燕歌有感

并州作客意如何石調重聞掩淚多回首燕山五年住一

聲如聽故鄉歌

將之關中留別吳二春田

百日飲無事酒五年讀中祕書文章浪解雌霓身世依然
塞驢遮扇塵辭庾亮拂衣膩怕劉輿此時西廡剪燭何日
東陘負鋤

臨汾置酒爲別別意與之淺深畏人客子在昔行路難歌
自今河流千里一折山背十日九陰重逢早向京國莫似
周南滯淫

和畢中丞悼亡詩

三天都處卽清都薄謫靈華縞袂姝第一名仙才伉儷八
千里宦其馳驅淡裝恰倚芙蓉鏡香供頻圍翡翠鑑二十

年來成小劫，碧城歸去不同途。

我讀中丞感逝篇，情文真覺後空前。禹疏不到相離水，媧
補難平有恨天。花步卜居成昨約，松門誓墓待他年。遙知
聽漏黃扉日，應撫衣熏一泫然。

元夜大雪飲石香齋

天公不放燈價高，故作玉戲酣今宵。太乙醉眠藜火熄，卻
化霏霏照書客。買書策蹇過大航，興來闌入元子坊。搃金
伐鼓客滿堂，主人壓醅喚客嘗。開簾看雪雪如席，燭光映
作輕綃色。此是仙人潤骨丹，傾入深樽壽千百。不須更唱
月分光，我自能歌冷飛白。火樹拉折銀花開，夜蛾拍空誰
剪裁。天然點綴此佳節，卻與我輩開羈懷。藏驅奪席爭掀

彫盤綺食如山堆堦前盈尺雪不到酒氣溢戶寒光迴
飲一杯歌一曲一杯爲我酌滕六爾能迴驕驄驅寶轂六
街無塵九門肅不能使石香齋頭燈不紅酒不綠客飲不
豪歌不續但願歲歲如今宵便不看燈樂亦足不然九州
大地豐五穀來歲燈如太倉粟

味辛客遊浙西余頃從楚南歸不得卽見悵然賦
懷以下補遺

不見雲溪趙夫子恩恩芳序變蕭辰舉頭秋月思前度到
眼青山憶故人握別霜天情似昔折殘楚畹淚猶新南行
多少聞猿意擬共尊鱸一細陳

誰知蹤跡亦飄飄藉草吟風興寂寥葉落江關秋瑟瑟雁

來澤國水迢迢此時應理吳淞楫有夢還隨歇浦潮遙溯
秣陵佳會近停樽一爲破無聊

味辛病愈兼示病中和章作歌歸之

吳興居士頃不憚襍被病渴金陵秋縱橫藥物亂錯鼎直
欲吸盡長江流青溪花月坐寂寞我亦捧腹溪南樓

時余亦小

疾後來聞君作歸計十幅蒲帆向東駛拄笏微哦定有神

一路雲山助清氣還家稻秀鱸魚肥病自欲好非人醫我
歸訪君得君詩巡簷環誦百不知邇來筆力更蒼硬緣知
作詩不關病偏我兀兀逢愁魔作詩苦少病苦多願從乞
得養生訣春秋佳日莫蹉跎

以上三首稿藏周君贊襄家

橫江春詞 其三

東梁山色對西梁淡掃修眉俯鏡光儂似望夫山上石一
般烟景各心腸

僧伽塔

高標湧出淮中流日月沐浴波蕩浮百年衝突屹無恙是
何神力支撐畱木又慧岸展身手黃熊退舍蒼光愁低眉
者誰坐泉底葱嶺來經八千里日出國見摩尼光揮灑楊
枝得天喜咒驅神鬼菩提心大千若會西來旨長安泗上
皆偶然香從何生臭何止塔成龍朔災建炎再厄經此洪
濤淹豈其慧照有明滅和合四大功難兼相傳火時塔飛
出見是神僧杖頭物騰空絕跡豈有靈此胡久置蛟鼉窟
化城等變苦海深天魔乃現盤尖鷲人疑師智止挈瓶定

中或被乖龍傾遂令淮泗失乾土恆河沙恐填難平我識
神通此其最厯劫愈多成不壞占一撮土分眾悲萬苦迷
中拓空界有時塔亦隨波流眼底纔無一絲掛

西陵

幾生修得住錢塘蘇小墳頭土亦香祇爲同心人去久盡
教松柏換垂楊

半畝園爲汪綏萬作

方丈或銘室十步或賦園古人用心厚窺見於遺篇良躋
列禦說三畝耘之難泉明恬淡人取數餘其全有園之見
存終未離言詮誰知樂所樂半畝亦已寬匠心一慘淡楚
楚致美觀周徑檻錄曲蔭階竹檀欒能令備秀野何啻開

林泉翛然寄弦誦天地歸幽便卽觀命名始綽可方前賢
主人曰否否此意吾次焉蝸繭匪足道所志承其先先人
此締構心力亦已殫嗣葉忽更主餘者荒榛菅未忍坐而
視每過增悲酸乃今展初志積苦已十年摩挲一木石手
澤猶依然上以蔽風雨中以陳豆籩詎擬國族聚聊免氛
塵喧聞言嗒自失見淺如游籜始知達人意端外求居安
莫前美弗彰莫後盛弗傳守成信非易再造彌爲艱舉世
昧遠識窮侈而極妍朝見金碧爛夕隨桃李遷盛衰亦已
矣何以慰九原孰若此焉足啓後方綿延頌禱待能事歌
以明衰衰

題汪埜儀圖照

其一

八峯林樹月中新
歲歲看花讓結璘
盜取一枝憑告我
此閒相隔幾由旬

雜題鄭素亭畫冊 其三

負擔琴書囊行行欲何適
誰云驢背人而非陌頭客

至日半隱閣看雪酬汪實夫卽用畱別

短晷將回次同雲正壓簷
積陰猶未化瑞雪又平添
賦已今年再看無此處
厭圍鑪非煖室塞竇豈窮閭
飛閣風衝角高峯玉並尖
面將寒共映骨受冷相砭
孰解平原羽疑傾斥海鹽
遠村低欲壓枯樹直難黏
乍引孤心迴旋欣勝賞
願主人頻喚舂穉子
自開簾皓潔交情擬清虛
道味兼挫糟涼可沁
斲莖趣同快懷有琅玕
贈言堪根柢覘郢歌

茲與激鐘律候同嚴謬許知言託頻將險韻拈如君才豈
易好我意何謙金愧脚牖音輪季子占未能忘爾爾聊
復和詹詹粉助雙麋寢鉛爭干鏤銛醜都緣愛忘譽恐爲
私嫌謂得新知樂俄愁遠道瞻論文杯乍合賦別袂先霑
親老身難許交深客已淹陰陽催去棹冰霰斷吟髯跡逐
蓬心轉才空火色炎邴因行始醉袁以臥成廉事業寸陰
惜身名尺蠖潛松標秀孤嶺梅意滿雙崦節尙淩寒峻神
惟嗜古恬重逢期在邇畱贈語休詰消息春來好先當寄
遠緘

別陳秋士次韻

其一

人分張帆駛去流停橈三日爲君畱雲山平變將行色風

月分懸別夜愁後約尺書勤遠寄前途一刺慎輕投自知
無事關飛動遲爾名山十載遊

春燕 其二

相逢歸雁話悲酸此日他鄉欲住難到此羨君歸計早稻
梁猶得慰天寒

贈明分司春巖次蔣清容先生韻 其二

論文太史記銜杯感激詩篇諷百回萬里白雲翹首處千
家霖雨下車來時旱久
得雨投書乍躡高齋屐訪士俄穿講院

苔一笑陽春滿天地可知緹室早飛灰

次韻贈蔣師退時偕洪穉存客維揚并懷高東井

南部烟花水部詩故人誇鶴久相期謂穉
存江湖貧病逢青

眼兄弟文章見白眉三舍日長談未倦二分月好客先知
窗梧漸有秋消息莫放長簾率地垂

趨庭多暇日追陪屈指江東有數才豈意司成三座設浪

隨都講一樽開

時在定甫先生座卽其尊人也

風前念舊絃同曲句裏生

溫玉是胎何限新知生別感滿衣清露獨徘徊

和錢百泉

其四

泠泠二十五條絃韻入江峯何處邊一片渡江明月夜更
誰能識孝廉船

偕嵇秋雲昆仲登九龍山

故人邀看九龍秋歷級穿雲最上頭但有長天隨海盡不
知大地與波浮半巖歎落驚山鬼萬壑風生撼佛樓我本

山中老猿鶴願攜籐竹日相求

以上十四首
見家藏初稿

題畫

土淨煙空點欲無一花一葉惹秋蕪
水精宮裏王孫畫憔悴何曾似左徒

子昂
爾

蒼涼翠袖感蕭辰林下風標本絕倫
掃出數枝斑竹影湘夫人對管夫人

仲姬竹
以上二
首稿藏吳君儆家

題黃麓隱畫冊

憶昔訪故人策驢入山去深山多白雲
風雨不知處

松棟茅茨竹石圍白雲斷處徑稀微
曉來一杖入山去攜得紫芝滿袖歸

得紫芝滿袖歸

輕帆趁歸潮蒼葭點秋水忽憶風雨晨
扁舟渡楊子

以上
三首

稿藏常
熱邵氏

兩當軒集卷第十六